



Yàlla mu kawe mi nee na: seddale naa julli ci sama diggante ak sama jaam bi ci ñaari xaaj, ñeel na sama jaam bi lu mu laaj

Jële na ñu ci Abuu Hurayrata -yal na ko Yàlla dollee gérëm- mu wax ne: dégg naa Yónente Yàlla bi -yal na ko Yàlla dolli xéewal ak mucc- tuy wax ne: «Yàlla mu kawe mi nee na: seddale naa julli ci sama diggante ak sama jaam bi ci ñaari xaaj, ñeel na sama jaam bi lu mu laaj, bu jaam bi waxee: {Alhamdu lil-Laah Rabbil haalamiina}, Yàlla mu kawe mi wax: sama jaam bi sant na ma, bu waxee: {Ar-Rahmaanir Rahiimi}, Yàlla mu kawe mi wax: sama jaam bi tagg na ma, bu waxee: {Maaliki yawmid diini}, mu wax: sama jaam bi màggal na ma, -am yoon bumu wax: sama jaam bi wéeru na ci man-, bu waxee: {Iyyaaka nahbudu wa Iyyaaka nastahiinu}, mu wax: lii sama diggante la ak sama jaam bi, te ñeel na sama jaam bi lu mu laaj, bu waxee: {Ihdinas siraatal mustaxiima, siraatal lasiina anhamta halayhim xayril maxduubi halayhim wa laddaaliina}, mu wax: lii sama jaam bi moo ko moom, te ñeel na sama jaam bi lu mu laaj».

[Wér na] [Muslim soloon na ko]

Yónente bi -yal na ko Yàlla dolli xéewal ak mucc- day xibaare ne Yàlla mu kawe mi dafa wax ci Hadiis bu sell ba ne: seddale naa saaru Faatiha ci biir julli gi ci sama diggante ak sama jaam bi ci ñaari xaaj, ma moom xaaj bi, mu moom beneen xaaj bi. Xaaj bu njëkk bi: sant la ak tagg ak màggal Yàlla, te dinaa ko ci fay gën gi fay. Xaaju ñaareel bi: toroxlu la ak ñaan, dinaa ko ci wuyu, jox ko li mu laaj. Aji-julli ji bu waxee: {Alhamdu lil-Laahi Rabbil haalamiina}, Yàlla wax: sama jaam bi sant na ma, bu waxee {Ar-Rahmaanir Rahiimi}, Yàlla wax: sama jaam bi kañ na ma tagg na ma, nangu na it mbooleem samay xéewal ci sama mbindéef yi, bu waxee: {Maaliki yawmid diini}, Yàlla wax: sama jaam bi màggal na ma, te mooy teddnga gu yaatu ga. Bu waxee: {Iyyaaka nahbudu wa Iyyaaka nastahiinu}, Yàlla wax: lii sama diggante la ak sama jaam bi. Xaaj bu njëkk bi ci aaya bii Yàlla a ko moom te mooy: (Iyyaaka nahbudu) te mooy nangu ne jaamu Yàlla moo ko jagoo, ak wuyu ko ci di ko jaamu, foofu la xaaj bi Yàlla moom yam. Xaaj bu ñaareel bi ci aaya bi jaam bi moo ko moom: (Iyyaaka nastahiinu) sàkku ndimbal ci Yàlla, ag digam ci dimbalee. Bu waxee: {Ihdinas siraatal mustaxiima* siraatal lasiina anhamta halayhim xayril maxduubi halayhim wa laddaaliina}, Yàlla wax: lii ag toroxlu la ak ñaan gu bawoo ci sama jaam bi, kon ñeel na sama jaam bi lu mu laaj, te nangu naa ñaanam gi.

النّجّات الخيريّة
ALNAJAT CHARITY

